

La via dal Bernardin

Dieta transcunfinala cun surpraisas

DA GUIU SOBIELA-CAANITZ

■ Quanta glied en terra rumantscha dastga sincerar d'enconuscher bain la Mesolcina? Segir pauca! I sa tracta da dus circuls grischuns situads per uschè dir davos noss dies, nua che nus gain mo darar. Era la populaziun mesolcinaiusa vegn pauc tar nus. Ella sa chatta paradoxalmain pli dalunsch davent dal rest dal Grischun dapi che la N 13, cun il tunnel dal Bernardin, l'ha colliada era per l'enviern cun las valladas dal Rain. L'autostrada ha avischinà Mesauc e Roveredo a las citads tessinaises, cunzunt a la metropola finanziaria da Ligiun (49 719 olmas). Tant pli ston ins savair grà a la Societad da cultura grischuna per la dieta ch'ella ha gist arranschà en il vitg da S. Bernardin cun l'agid da Luigi Corfù (Mesauc) e Paolo Mantovani (Soazza).

Il tema era gist quai che colliava la vallada cun il rest da noss chantun, cun la Svizra alemana ed indirectamain era cun la Romandia: «La via dal Bernardin». Var sessanta persunas han sa rimmadas en ina sala polyvalenta da la fracziun. In'unica critica ston ins far a l'organisaziun: Ils quattordesch referats, ils bainvegnis e la conclusiun avessan merità dus dis entirs empè da mo in. Igl era però vaira grev, er en la segunda mesadad d'avust, da chatrar ina chombra libra en il vitg. I po esser ch'il chantun Tessin limitrof (324 851 olmas) haja termins differents dals noss areguard las vacanzas da stad. Il program da la dieta cumpigliava anc duas turas d'in di mintgina, l'emprima sin il pass e l'autra al cunfin talian. I suonda la resumaziun dals referats prin-

cipals, moderads dal nunstunclantaivel Chasper Pult (Pasqual), ils quals han manà insaquantas surpraisas als giasts.

Visiuns futuristicas e chats preistorics

L'emprim bainvegni è stà s'enclegia quel da Romano Fasani, «sindaco» da Mesauc. Il segund bainvegni ha manà l'emprima surpraisa. Nus enconuschain la regiun Surselva, ma d'ina regiun Mesolcina na daud'ins mai. Ina tala datti tuttina; ses vicepresidente Martino Righetti (Cama) ha referì davart las visiuns regiunalas per ils onns proxims. Per nus famigliar è il prenum Martin, regurdientscha d'ina veneraziun millenara da la Baselia retica per l'apostol da la Gallia franca (316–397). La Mesolcina ha plis projects: Sviluppà la zona industrial da San Vittore, restructurar las chasas d'attempads, examinar las pussaivladads da fusiuns communalas, bajegiar in center sportiv empè da quel ch'ins ha unfrì al sviament da Roveredo, realisar cun l'Interreg la colliaziun stradala cun Clavenna u cun Campodolcino, en la vallada dal Liro, tranter Clavenna ed il Pass da Spleia. Patrick Nagy, collavuratur dal Servetsch archeologic chantunal turitgais, ha sa spezialisà en l'interpretaziun da fotografias or da l'aria ed en la perscrutaziun dal temp da fier. L'enviern proxim sto cumparair ses cudesch davart ils chats da Castaneda; sper lez vitg da la Val Calanca han ins cumprovà l'existenza d'ina culegna e d'ers neolitics (terz millenni a. C.) sco era da var tschient fossas cun tutta sort objects e schizunt crias etruscas (dal sisavel al segund tschienta-

ner a. C.). La schlatta ungaraisa dal referent ha scumbiglià singulas persunas or dal public; ins ha dumandà Pult sche «Nagy» saja in num rumantsch.

In archiv istoric per trais circuls

In punct culminant da la dieta è stà il referat da l'istoricher Andrea a Marca (Blinzuna), collavuratur dal Post da dialectologia ed etnografia da la Svizra italo-fona. Il referent ha deditgà sia dissertaziun milanaisa al transport da laina mesolcinaiusa sin il Lago Maggiore en il 18avel e 19avel tschientaner. Ussa maina l'Archiv a Marca (1), fundaziun creada 1981 da la secziun regiunala da la Pro Grigioni italiano per racogliar, catalogar, tegnair en salv e metter a disposiziun dal public ina documentaziun che resguarda ils circuls da Calanca, Mesauc e Roveredo. I sa tracta cunzunt da 10 000 brev, 500 cudeschs e carnets manuscrits, passa 700 stampats, cartulinas e fotografias, plinavant documents da pergiamina, plattas fotograficas, maletgs en ieli euv. Uss planisescha l'archiv da bajegiar or a Mesauc in'antieriura stalla, antruras lieu da deposit per rauba, susta da chavals e da vitgira. En il plaun sut vul ins drizzar in deposit da betun armà tuttafat impermeabel, climatisà tenor tuttas pretaisas da maganisaziun encunter l'umidità, il fiu, la glisch, chamulaunas e miurs, inundaziuns, acids ed undas magneticas. Suentar la renovaziun duai l'antieriura stalla da chavals vegnir la sedia da l'archiv.

Fascinanta cuntrada da pali

Barbara Beer (Haldenstein), magistra da

didactica ambientala a la Scola auta pedagogica grischuna, ha mussà maletgs fascinants da la foppa dal pass e declerà sia genesis dapi l'epoca glaziala. Quel vallà furma oz la pli gronda cuntrada da pali da la Svizra e schizunt da las Alps; ella stat pia sut protecciun federala en virtid da la memorabla iniziativa da Rothenturm, approvada 1987 dal suveran. La pali da turba deriva da plimatschs da mistgel che han sa sviluppads suenter la regressiun dal glatscher alpin. Tras ils millennis ha lura sa furmada ina tundra cun adina dapli lareschs e schembers; silsuentar han sa chasads era zunders e pigns, pir lura la drossa. La referenta crititgescha che pasters e militars (craters da granata) na respectian betg adina la cuntrada protegida. Ella ha gia inventarisà la flora dal S. Bernardin e lavura pia en la medema direcziun sco il botanicher engiadinais Romedi Reinalter (v. La Quotidiana dals 26 da favrer 2008). Dus referats han lura descrit sendas che collian directamain la Mesolcina cun la regiun da Clavenna. L'emprima entschaiava a Pian San Giacomo, tranter S. Bernardin e Mesauc, e maina sur il Pass Baldiscio (2353 m) enfin ad Isola, fracziun da Campodolcino. Referì davart lezza senda ha Enrica Guanella (Campodolcino), fundatura e manadra dal museum local (2). La segunda via entschaiava a Soazza, tranter Mesauc e Cama, e maina sur la Forcola (2220 m) a Gordona, sper il flum Mera, a sid da Clavenna; l'expert è stà Paolo Mantovani, manader dal Center cultural da Soazza. Perquai prevesa la regiun da colliar la vallada cun la provinza da Sondrio collavurond cun l'Interreg.

Il Cuolm Val

La Quotidiana dals 14 d'avust (p. 3) fa endament la Veptga, pass memorabel en l'istorgia militar pervi dal til da general Alexander Vasilievitch Suvorov († 1800). Lez è bain in dals paucs militars russ da l'istorgia ch'ins ha «resentiu a sias uras sco deliberatur»; igl era gea il temp da Napoleon Bonaparte (1769–1821). Gion Deplazes ha laschà reviver il temp dals Russ en ses roman «La bargia dil tschëss». Ma la senda da Glaruna a Pigniu va vinavant encunter sid, enfin a Val S. Pieder e lura sur il Cuolm Val giu la Valragn e sur il Bernardin. Davart lezza veglia colliaziun ha referì l'istoricher ed anteriur cuss. naz. Martin Bundi, sa basond sin las perscrutaziuns d'Otto Clavadetscher e sin sias atgnas retschertgas. Ins frequentava il Cuolm Val gia dal temp da Carl il grond († 814), t. a. per manar vin talian encunter nord. Il cronist Antonio Vignati, al servetsch dals signurs Sforza da Milaun, ha descrit la ruta dal nord sur Spleia ed il Cuolm Val. Bundi ha pia cumpletà noss maletg d'ina via alpina millenara che haja gidà a far da la Rezia e dal Grischun in liom vital tranter l'Europa dal nord e quella dal sid. Quai han ins sentì era durant lezza dieta bler memia curta.

1) Adressa: Fondazione Archivio a Marca, 6563 Mesauc. Tel. 079 883 09 10.

Posta electronica: info@archivioamarca.ch. Internet: www.archivioamarca.ch

2) Adressa: Museo della Via Spluga e della Val San Giacomo, Consorzio Frazioni Corti e Acero. Palazz. Piazza S. Antonio. I-23021 Campodolcino. Telefon e fax: 0039 0343 50628.

Posta electronica: info@museoviaspluga.it